



## **Sujet 2015:**

### **Jedem sys eigene Bänkli zum 150. Geburtsdag vo der BLKB....!**

Mir bsueche die verschiidene Bänkli in eusem Kanton samt de neue Grillblätz. By de Grillblätz chömme sich eusi Chlyyne vor wie Zwärgli.....!

Eusi Kantonalbank BL het sich zum 150 Joor-Jubiläum im 2014 nid lo lumpe, si hai in euse 5 Bezirk Raschtblätz gstiftet wo me cha grilliere, sitze, ässe, spiele und als Hit ufe 3 Meter höchi, tonneschweri Mega-Sitzbank us Eicheholz ufe chlättere und wiider abegumpe!

Als wyters Gschänk het d BLKB 150 Sitzbänkli in allne Gmeinde vom Kanton Baselland lo ufstelle. Die Bänkli sy in orangesch, gääl, grünen, blau oder violett und lade y zum Verwyle und Gniesse amene wunderschöne Ort in eusem sälbständige Baselbiet. Uf jedem Bänkli hets au e Joorzaal vom Gründigs- bis zum Jubiläumsjoor vo der BLKB und dass de weisch wo du überhaupt hocksch, isch ufere Dafele au der Standort churz beschrybe..... Super!

Wenn du gnau wotsch wüsse, wo die Bänkli stönde und die Raschtblätz sy, denn chansch gratis in allne Niiderlasige vo der BLKB e Panoramacharte „Wandere und Raschte im Baselbiet“ go hole. (Es het so langs het!)

Mir chönne euch numme empfähle, gönget mit der Familie oder mit Fründe ufe sone Raschtblätz, gniesset s Grilliere und s Spiele und hocket als Hit uf d Mega-Bank, machet e Foti vo unde zum Verschicke an alli Bekantti und Verwandti, die wärde stuune und froge, wos denn so öbbis git!

Zum Abschluss vom Jubiläumsjoor und als Hauptattraktion blant d BLKB jetz no amene Ort im Kanton e sogenannte „Baumwipfelpfad“ z erstelle. Nach diverse Standortabklärige im ganze Kanton isch d Waal uf Lieschtel gfalle. Ufem Schleifebärg, in der Nöchi vom Uussichtsdurm und Durmwirtschaft sell das Bouwärch entstoo. Es isch notabene s Erschte in dere Art in der Schwyz.

Wie das halt eso isch in Lieschtel, gönge d Meinige zum Sinn, Zwäck und zum Betrybe vo somene „Baumwipfelpfad“ wyt uusenand. Nach ville Vote derfür und dergege het aber e guet bsuechti Bürgergmeiniversammlig joo gsait zu däm Projekt.

Jetz isch klar, in nächschter Zuekunft chönne mir mit der Schuelklass, der Familie oder mit de Änkelchinder vo der Windetalerhöchi über e Waldleerpfad ufe Schleifebärg zum „Baumwipfelpfad“ wandere, denn bis uf 22 Meter Höchi über dä Pfad flaniere und am Schluss by der Durmbaiz e Wurscht grilliere. Apropos Durm, dä wird au in der Zuekunft am höchschte sy und wyt über d Baumwipfel uuseluege!

Für eus gits jetz aber nid Bänklisitze und Grilliere, mir wei mit eusem Sujet an der Fasnecht brilliere, drum ab uf d Gass, d Fasnecht gniesse, vill lache und vor allem uus eusem Stedtli mit drummle und pfyffe e läbigs Lieschtel mache!

---

**Wie allewyyl isch am Fasnechtszyschdig d Ladäärne-Uusstellig in der Roothuusstrooss vom zwöi Zmidaag bis am nüüni oder no spööter Zoobe!**